



15. november - 2024

UKA2024/11

## **2013-imut Nunatta Karsiata naatsorsuutaasa akuersissutigineqarnissaannik siunnersuut.**

(Aningaasaqarnermut Aatsitassanullu Naalackersuisoq)

2023-mut Nunatta karsiata naatsorsuutaanut Kukkuersiuinermut ataatsimiititaliap isumaliuutissiissutaanut tunngatillugu Siumup tungaanit suleqatigiissimanermut qujavugut.

Nunatta karsiata naatsorsuutaanik suliaqarneq oqitsuinnaaneq ajorpoq qulaajagassarpasuit eqqumaffissaasarmata. Suliaq imaannaanngitsoq kiisami naammassiartulerparput, oqaaseqaat annertoq partiilersorfiumngitsumik ersarissumik nassuiaanernik imalik suliarinikuullugu.

Taamatut aallarniuteqarluta, imm. 11-mut, nunatta karsiata 2023-mi naatsorsuutaasa akuersissutigineqarneranut Siumumiik imatut oqaaseqaateqassuugut.

Aallartivitsinnanga Inatsisartut Kukkuersiuinermut ataatsimiititaliaata suliassai ima issualaarpakka:

” Kukkuersiuinermut Ataatsimiititaliap suliassaani pingaarnerpaaq naatsumik oqaatigissagaanni tassaavoq, ukiumut ataasiarluni Nunatta Karsiata Naatsorsuutaanik misissuinissaq tassungalu kukkuersiuisut oqaaseqaataannik misissuinissaq. Inatsisartoqarnikkut nakkutiginninnermi makkua misissuinermit qulakkeerneqassapput

1. naatsorsuutit eqqortuunersut (aningaasaqarnermik kukkuersiuineq),
2. inatsisit, malittarisassat, aningaasaliissutit nalunaarutigineqarnikut allallu najoqqutassat malinneqarnerisut (inatsisit atuutsinneqarnerannik kukkuersiuineq), aamma
3. Nunatta Karsiata aningaasaatai malitassat malillugit pisortani pitsaasumik aningaasaqarnikkut aqutsinermi ingerlanneqarsimanersut, tassunga ilanngullugu pisortatigut aningaasalersuineranut atatillugu sipaarniarnissap, naammassisaqarluarnissap sulilluarnissallu qulakkeerneqarnissaannut sapinngisamik naammaginartumillu qanoq iliortoqarsimanersooq (ingerlatsinermik kukkuersiuineq)”.

Ataatsimiititaliap suliassaannut ilaavoq, suliat assigiinngitsut iluamik siunertarisat malillugit ingerlasimanersut aamma nakkutigissallugit.

Tamatuma kingorna Ataatsimiititaliap isorisinnaasani saqqummiuppagit Inatsisartut namminneq aaliangigassaraat qanoq Naalackersuisunut malitseqartitsissanerlutik, taamatuttaaq ataatsimiititaliaq isornartorsuisimappat Naalackersuisut politikimi akisussaasutut pissutsit iluarsineqarnissaat qulakkeersimanissaat pisariaqarpoq.



Siumumiik kontot tamaasa oqaaseqarfigingikkaluarlugit pingaarnersiulluta oqaaseqaateqassuugut.

Siullermik maluginiagassaavoq, kukkurnersiuisup 2023-mut Nunatta Karsiata Naatsorsuutai pillugit nangaassuteqarnani oqaaseqaateqarfigimmagit taamaattorli immikkut tikkuarneqarjaa, Namminersorlutik Oqartussanit nakkutilliisarneq naammaginatumik ingerlaneq ajortoq isumaqarpugullu nakkutilliineq ullumikkornit sukumiinerusumik ingerlasariaqartoq.

Kukkurnersiuiunerup takutippaa, erninermut atatillugu Amaat/Ernereermermi aningaasaateqarfik sinneqartooruteqarujussuarsimasooq tamannalu tunngaveqartoq suleriaatsimik allanguisoqarsimannginneranik imaappooq suliffeqarfiit namminersortut suli erninermut tunniussisarsimassasut naatsorsuutigineqarpoq. Suliap taassuma misissuiffigineqaaqqinnissaa pisariaqarmat innersuussutigissuarput ataatsimiititaliamit naalakkersuisunillu eqqumaffigineqassasoq.

Pisiniartarneq aamma kiffartuussinermilu akiliutit, aningaasanut inatsimmi konto 31.03.33 atuinikiffiusimaneranut kommunit tallimaasunit pingasut utertitsinissamut qinnuteqaataannik tiguisoqarsimannginnera maluginiarneqarpoq, kontomi tassani 2023-mi 4 mio. kr. amigaatigineqarput. Taamaattumik immikkut ittumik sakkortuumik nakkutilliinerup sukaterneqarnissaanik kukkurnersiuisup piomasaaqataa Siumumiik taperserparput.

Nakkutiginninnermi sukatigassanut ilaavoq sillimmasiisarnermut tunngassuteqartut, ullumikkut qulakkeersimaneqanngimmat annertuumik ajutoortoqassappat suliffeqarfiit tamarmik naammattumik sillimmateqarnersut. Taamaattumik kukkurnersiuisup innersuussutaa tassalu immikkut nakkutiginnittunik pilersitsinissaq Siumumiik taperserparput.

Kukkurnersiuisumit nalunaarutigineqarpoq, naatsorsuutini immikkoortortat arlallit pisiat 500.000 kr. sinnerlugit akillit pisiniartarnermut allaffimmuut nalunaarutigineqarnissaat pillugit malittarisassanik ilisimasaqarsimanngitsut taamaattumik paasissutissiinerup pitsaanerusumik ingerlanissaa pisariaqarpoq. Pisiniartarneq kiffartuussinermullu tunngasut eqqarsaatigalugit paasissutissat eqqortut pisariaqarput taakkualu tamatigit qulakkeerneqartarnissaat uangutaaq Siumumiik piomasaraarput.

Ingerlatsinermut tunngatillugu kukkurnersiuiineq eqqarsaatigalugu arlalinnik tikkuagassartaqarpoq.

Konto 20.11.70 meeqqanut tarnimikkut nappaatilinnut suliniutissat pilersaarutaasut ilaatigit sulisussaaleqineq peqqutigalugu aningaasaliissutit immikkoortinneqartut atugassiissutigineqarsimannginneri ilungersunartutut Siumumiik isigaarput taamatullu ataatsimiititaliap **isornartitsinera** isumaqatigalugu. Tassami aningaasaliissutit meeqqanut tarnimikkut nappaatilinnut suliniutinut atugassiissutaasut pingaaruteqarluinnaraluarput annertuumillu pisariaqartinneqarlutik. Taamaattumik aningaasaliissutit suliniutissallu piviusunnagortinneqarsimannginneri Siumumiik akuersaaruminaatsutut isigaarput taamatullu piomasaraarput, aningaasaliissutit atorfinitsitsinerillu atorluarneqartarnissaat qulakkeerneqassasoq.

Nalikilliliinerit pisariaqartut ingerlanneqarsinnaasarput taamatuttaaq Nunatta Karsiata naatsorsuutaani 2023-meersuni nalikilliliinerit isumakkeerinerillu pisimasut takuneqarsinnaavoq.



Taamaattumik innuttaasut suliffeqarfiillu akiitsui amerlasoorujussuit qanoq ittumik politikikkut iliuuseqarfigineqartariaqarput ilaatigut akileraartarnikkut aaqqissuusseqqinnerup iluani.

Soorlu isumaliuutissiisummi atuarneqarsinnaasoq, Kukkunersuinermit Ataatsimiititaliamit ingerlatsinermik kukkunersuisut misissuinerannik anginernik 2023-mi Nunap Karsiata Kukkunersuisuanut inniminniisoqarnikuunngilaq. Aamma Nunap Karsiata kukkunersuisua nangaassuteqarnani suliffeqarfiit nammineertitat ataatsimut isigalugu naatsorsuutit eqqortumik takutitsisutut nalilerpai taamatullu isorinnilluni oqaaseqaatitaqanngitsumik naatsorsuutit inernilerlugit.

Kommuninut tunngatillugu, ukiumoortumik kommuuninut tapiissutit siunertaminnut atorneqartarnissaat Siumumiik piumasarivarput tassami pisortatigoortumik akissutaasartut aammalu sinerissamiit tutsiuttartut ersarissitippaat Inatsisartuni aningaasaliissutigut kommuninit akisussaaffigineqartut ilarpasui siunertaminnut atorneqarneq ajortut ass. nunaqarfinnut isorliunerusunullu aningaasaliissutit, ineriartortitsinissamut aningaasaliissutit, illuliortiternissamut aningaasaliissutit il. il. Taamaattumik naalackersuisunut Siumumiik kaammattuutigerusupparput, nakkutiginninneq tassuuna aamma sukaterneqassasoq.

Ukiut kingullit Kommuneqarfik Sermersuumi inatsisitigut unioqqutitsinerit annertuumik quarsaarutaasarpur piffissamilu kingullermi Kommune Kujallermi pisut aamma annertuumik quarsaarutaappur, taamatut pisoqartarnera Siumumiik ilungersunarluinnartutut isumaqarfigaarput. Naatsumik oqaatigalugu akisussaaffimmik nakkutiginninneq killeqarsimavoq. Akileraarutit akilernissaat puigorneqarsimavoq inunnillu isumaginnittoqarfik ajoraluartumik nakkutigineqarsimannngilaq. Siusinnerusukkur paasineqarpoq Kommune Kujalleq 40 millionit koruuninik akileraarutinut A-nut akiliisimanngitsoq, taamaalillunilu aningaasat allanut atorneqarsimammata kommunillu karsiani aningaasat amigaatigineqarmata, kommune akiitsoqarujussualersimavoq tamatuma kinguneraa meeqqanik inissiisarnerit ilaatigut sipaarutaassammata tamanna ernumanarluinnartoq Siumumiik isumaqarpugut. Kommune Kujallermi A ajornartorsiutit nammannissaat kommunip artulermagu Naalackersuisut maanna arsaarinnittussanngorput.

Siusinnerusukkur paragraf 37 tunngavigalugu apeqquteqaateqarnikuuvunga, isumaginninnikkut kommuunini sulisoqarnerup ajornartorsiutaanera pillugu akissuteqaammi ersarippoq kommunit isumaginninnikkut sulisoqarnermi tamarmik ajornartorsiuteqartut taamaattumik Naalackersuisut Siumumiik kaammattorusuppagut inissisimaffik ilungersunartoq immikkut ittumik sukumiisumik iliuuseqarfigeqqullugu. Qulaani tunngavilersuutigisagut innersuussutigalugit Naalackersuisut piumaffigissuagut Kommune Kujallermi pisoq Kommunit nakkutilliisoqarfiannut ingerlateqqeqqullugu soorlutaaq tamannaqqissaaq ataatsimiititaliap naalackersuisunut isumaliuutigeqqullugu innersuussaartoq.

Siumumiik Nunatta Karsiata naatsorsuutaanut 2023-meersunut taamatut oqaaseqarluta, Deloitte Nunatta Karsiata 2024-mi naatsorsuutai pillugit kukkunersuisussatut Kukkunersuinermit Ataatsimiititaliamit inassuteqaatigineqartoq akuerivarput.

Doris J. Jensen, Siumut